

RNI. No. MIZ.MUL/2009/29499  
Postal Regd. No. MZR 82/2010 - 12

To

**From :**

**LAITAI**

**ZBC Office,**

**Champhai - 796 321**

**Mizoram, India.**

# LAITAI

**Vol. II. No. 4. April 2010**



*Pa S. C. Mang, Sesih English Medium School  
Choukidar khasum a piapa*

**Editor : Rev. Suan Khan Thang**

# LITAI

(An organ of the Zomi Baptist Church)

Vol. II, No. 4. April 2010

**Editor :**  
 Rev. Suan Khan Thang  
 B.A., B.D., M.T.S  
 ☎ 09615558559

**Editorial Board :**  
 Upa Zam Za Lang  
 Upa Zam Khan Kap  
 Upa J. Thawmte  
 Sia Nang SianMung  
 Pa Zam Lian Thang

**Business Manager:**  
 Sia N. Chin Thang  
 ☎ 09615948861  
 Sia Tin Sawm Lian  
 ☎ 08014225066

**Circulation :**  
 Pa Thang Khen Muang

**Address :**  
 Laitai,  
 ZBC Office  
 Champhai - 796 321  
 Mizoram, INDIA

Office : 03831-234700  
 Email : zomibaptist@yahoo.com  
 Website : zomibaptist.com

<b>Zon-olna</b>	<b>Laimai</b>
Editorial	01
Jesu Singlamteh	
Rev. Gin Lam Thang	02
Kisinna	
Pastor Halellujah Sum	04
Khamtung gama Pasion thu...	
Rev. G. K Nang	06
Revival leh Evangelism	
Kham Do Pau	10
ZBC Mission Khawmpii	
Tg. Tin Sawm Lian	12
Vengthar biakinn huna plate	17
62 <sup>nd</sup> Zomi Nam Ni	18
Tulai Thupiangte	23

**Laitai kum khat tatman :**  
 India & Kawlgam ..... Rs. 50/-  
 Gamdangte ..... U.S. \$ 5/-

**Edited & published by** Rev. Suan Khan Thang, on behalf of  
 Zomi Baptist Church, and printed at C.K. Printing Press,  
 Champhai, Mizoram - 796 321, and published at Bethel,  
 Champhai, Mizoram - 796 321, INDIA  
 Copies - 900

# DAHPIHNA



Nu Cing Biak Mawi (19) w/o Pa Zam Pian Thang, Hiangmun khua in February 14, 2010 ni in Lamka zatopi panin a pasal leh a innkuanpihte nusiain a tawntung mun ding hong zuatsan hi. Inn lamah Evan. Za Biak Thang in vuina hun zang a, han lamah Upa Cin Za Lian in thungetna hun zang hi.

Nu Mang Khaw Hau in March 8, 2010 niin Champhai panin hong nusia hi. A luang pen New Champhai ZBC Upa Dam Khan Go in lain, tua ni mahin Rev. Cin Khan Tuang, Champhai Area Pastor in inn lamah vuina hun zang a, han lamah Upa Zam Za Lang in thungetna hun zang hi.

Siattuakte innkuanpihte Laitai Editorial Board in kithuakpih mahmah a, Pasion hehnepna kideihsak hi.



A sunga thuluite(articles) thu hong luikhiate? sandan hi a, Editor saandan hi kim lo hi.

## Editorial.....✍

### LAWHCIN NADINGIN KISIN NGAM NI

Mi kuamah nasep dan a siamsain a piang om lo a, a kisinte bek in siamna nei uh hi. Mi lawhcing leh daupai i hih nadingin a siamzaw, a theizawte' makaihna leh lamlahna thumang takin zuih kisas hi. Kisinna (Training) om loin Pawlpi, kumpi leh company khatpeuh khangto thei lo hi. Tua ahah manin i gama missionary masate in gospel hong puak tawh kizuiin siamsinna dingin sanginn hong phut pah uh a, Tedim mite bangin missionaryte pen 'sang (school) mangte' na cih lawh liang uh hi.

Zogam sung khantohna en lehang Chin Hills ah Missionaryte in siamsinna sanginn a hon masakna Hakha, Thuklai leh Tedim hi a, tua kuate panin mipil leh makai tampi piangkha hi. Manipur gam Zomite lakah Songtal, Hanship leh Mission Compound khawngah sanginn na om masa ahah manin, tulaia Manipur gama makai tampite tua khua sanginn panin a khangkhiate ahi uh hi. Tom gen lehang, sanginn hoih omna khua peuhah mipil laisiam kiseekkhia hi. Tua ahah manin, i tu i tate pilin, siamin, gual eng loin a om ding i deih leh, sang-inn hoih omna khua ah teng a, tua ah pilna siamna i sin ding thupi hi.

Kamsang Malakhi hun lain Israelte in Pasion samsiatna thuak uh a, lo leh huan za pipi a neih uh hangin, a gah nek ding om lo hi. Bang hang hiam cih leh, Israelte in Pasion sangin a thupha na buaipih zaw uh a, Pasion hehsak kha uh hi. Pasion thupha a ngah nadingun Pasion in a nasep gah uh seh sawm suah seh khat Pasion tungah pia dingin deihsakna lianpi tawh hilh hi. Tua bang a piak uh leh thupha piak dingin kameciam hi (Mal. 3:10).

Zomite zong i sep i bawl na ah lawhcin daupai i ut leh, Pasion' tanh tuam ahi sawma khat sumpi maan takin piak kisin lehang, Pasion i tungah lungkim peuh leh, i mavangin i daupai ding a, i omna Pawlpi leh i minam Pasion in hong domsang ding hi. Oswald J. Smith in, "Mi genthei tampite, a neih lai uh a Pasion adingin a pia nuamlote ahi uh hi", ci hi. Pasion neihsa ahi sawma khat sumpi a guksakte a sepnah a lawhsap leh a lamdang hi lo hi. Tang lai Israelte zong sawma khat a piak loh manun Pasion in na samsia ngei hi (Mal. 3:4).

## JESU' SINGLAMTEH

- Rev. Gin Lam Thang, Shillong

*"Ama singlamteh ding pua a, Luguh Mun lamah a paikhia hi. Amaute in amah singlamteh tungah a kilh uh hi"*  
(Joh. 19:17,18, ZIV).

Khristiante adingin singlamteh tunga Jesu sihna leh hong honkhia dinga a kipiakna sanga manpha zaw om thei lo ding hi. Singlamteh tunga sihna pen a muhdahhuai sihna leh bawlsiatna ahah manin, mi gilote sihna dinga a kiese tuam ahi hi. Tu kum Good Friday hunah Jesu' singlamteh thu lungngai khawm dihi ni.

### **Thuciam Lui leh Singlamteh :**

Thuciam Lui Lai Siangtho ah singlamteh tunga Jesu thuakna lim tamveipi kimu hi. Mawh sutna ding leh Pasion tawh kilemna dingin gan sisan a luan loh phamawh hi " ... pumpi nuntakna pen si sungah om hi...kilemna bawl na dingin biakna tau tungah tua si ka pia zo hi" (Siam.17:11). Mawhna pan kisiansuah dingin sisan kizang a, sisan luang loin mawh maisakna om thei lo hi (Heb.9:22). Hih in singlamteh tunga Jesu a sih zia ding genna ahi hi. Lai Siangtho mun dang, Late 22 leh 69; Isa.53; Dan.9:26; Zek.11:11-13;13:6,7 etc. ah zong Jesu in singlamteh tungah a thuak ding thu kigen hi.

### **Biakna tau (maicham)leh**

**Singlamteh :** Tanglai hun pan kipanin Biakna tau pen biakpiakna mun in kizang hi. Tua biakna tau in kithoihna, kilemna, lungdam kohna leh biakpiakna mun ahi hi. Tua biakna tau tungah meihal biakpiakna mei mit loin kuang den hi. Noah in Pasion biakna dingin biakna tau bawl a, Abraham leh midangte in zong bawl hi. Thuciam Lui hun lai-in Biakna tau tungtawnin Pasion a kibiak mah bangin, Thuciam Thak hunah Singlamteh pen leitung mihingte khempeuh adingin Biakna tau hong suak hi (Heb. 9:13,14). Biakna tau tungah kithoihna gan a kihal tum bangin, eite kithoihna dingin singlamteh tungah Jesu hong si

hi(Rom 3:25). Jesu sihna pen khang tawntunga hehpihna i ngah theihna ahi hi (Heb.9:26). Jesu sihna pen eite adingin biakna tau ahih manin, a tuama biakna tau bawl kisan nawn lo hi.

**Kithoihna tuuno leh Singlamteh tunga Khriis :** Israelte in mawhna hanga kithoihna a neih uh ciangin keel nih paipihin khat zaw pen go uh a, a sisante hehpihna tokhom tung leh a kimah theh uh hi. Khat zaw ahih leh Siampipa in a lutungah a khut nga in, mawhneipa' mawhna khempeuh pulak a, tua khit ciang sehnel gamah paipih in khah khia uh hi (Siam.16:15,20-22). Hih in Jesu Khriis in i mawhna pana hong tatkhiatna ding lim ahi hi (Matt. 20:28). Jesu in zong singlamteh tunga a sih ding thu tam veipi gen hi. Ama sihna in kithoihna bucing a bawl hi.

**Singlamteh tunga Sisan :** Mihingte mawhna hangin singlamteh tungah Jesu sisan kibua a, i mawhna thaman dingin Jesu in a nuntakna pia hi(1 Pet. 1:18,19). Gethsemani huan

sungah Jesu sisan khaw-ul bangin luang a, linglukhu a khuksak uh ciang zong luang hi. A khut leh a khete a kilhcip laiun a sisan luang a, teipi tawh a nak a sutna uh panin zong luang hi. Ama sisan luanna hangin eite in hotkhiatna i ngah hi (Isa. 53:10). Jesu sisan hangin Pasian leh mihing kilemin om thei hi (Efe.2:11-17).

**Khristian leh Singlamteh :** Singlamteh loin Khristian biakna bukim thei lo a, kha khanlawhna zong tung thei lo hi. Jesu' singlamteh maia khukdina kikapna loin pianthakna kingah thei lo hi. Jesu in ama singlamteh pua in Kalvary ah sihna a thuak mah bangin, eite in zong Jesu nung zui dingin eima singlamteh mah i puak kisan hi. Ama khekhap zui loin amah tawh kizopna om thei lo hi. Amah tawh i sih khop leh amah tawh i tho kik ding hi. Pawlpi hi in mimal hi ta leh singlamteh tunga Jesu thuakna loin nuntakna leh thahatna om thei lo hi.

**Thukhupna :** Sairin khuami Simon bangin Jesu singlamteh a

takin (physical cross of Christ) kipuakpih thei nawn lo hi mah leh, Jesu leh a gam ading kipiakna, thuakna panin Jesu' singlamteh kipuakpih thei hi. Jesu in, "Mi khat peuh ka nungzui a suah nop leh ama deihna bangin gamta nawn loin, a singlamteh kisuan in hong zui ding hi" ci hi.

Jesu deihna bang hi lo, ama deihna banga Jesu nung zuih a sawmte na khat peuh ah hehna ding mu baih, nuakna ding thei, ama deihna banga vai a kihawm loh ciang a thanem baih hi. Thuakna tawh Jesu' singlamteh i puakpih takpi hiam cih kisit tel ni. ■■

## KISINNA

- Pastor Halleujah Khawm Lian Suum  
M. Th. (Miss.) Final  
Aizawl Theological College.

### 1. **Kisin i cih bang a hia?**

Mihing i nuntaknaah '*Kisin*' cih pen a lo thei lo leh a kul, a kisan hi. Khatvei lei ah kipiangkhi ahih manin mihing i nuntakna sungah kisin ding vive hi. Tua ahih manin kisin cih pen i siamloh, i theih loh, i uploh, i hih ngei loh khat hih cihna hi-in, kisin cih limlim pen khantohna khat hi pah hi cih pen theihhuai sa ing.

### 2. **Kuate "Kisin" ding?**

Mihing kician khat limlim adingin 'kisin' na kisan hi. Tua hih manin a kisin lo mi leh kisin

ut lo mi pen mi kician lo, mi bang pha lo hong suak hi. Gentehna in, mi bang lo, mihai, leh kician lote kisin ut lo hi. Tua ahih teh kisinna pen mi khempeuh, nang leh kei ading hi a, kisin ding ahi hi.

### 3. **Bang 'Kisin' ding?**

Hih thu tawh kisaiin, amalmalin genleng tam lua ding a, i nuntakna-ah, a kul khempeuh kisin ding hi. Ahi zongin hih laiah kidop ding khat in Eden Huan pek pana Pasian in mihingte hong piak sia leh pha

khen tel theihna tawh kisin ding hi a, na hoihte bek kisin in, a hoih lote kisin khak vet ding hi lo zel hi.

#### 4. Koi banga 'Kisin' ding?

- i. Kisin nopna lungsim nei ding.
- ii. Kiniamkhiat kul, hong kihilh theih nadingin.
- iii. Khial leng tuak leng hih ngamna, hangsanna neih ding kizam.
- iv. A siamsa a suak omlo ahih manin i siam pah kei zong lungkia ngei loin i siam dong kisin ding hi.

#### 5. Bang hang a 'Kisin' ding?

A tompenin gen leng bel, mihing i hih manin kisin ding. Leitung thu leh Kha thua mi lawhcing, mipil, misiam, milian, mi minthang etc. te a kisin phot lo mi om lo hi. Sin manin bang teng hamphatna om thei hiam cih leh:

- i. A kisin nu/pa hampha masa pen.
- ii. A innkuanpihte in hamphat lawh.

iii. Pawlpi, lawm le gual, beh le phung, u le nau in hamphat lawh.

iv. Gam leh minam in hamphat lawh.

v. Pasion deihna tangtungin Padian minthang ding, Pasion a minthan leh tua sungah a kisin nang le kei zong kimintahgn lai ding hi.

Tua ahih manin uk cintenna tawh Kisin a, siam theih nadingin kiniamkhiatin, khial leng tuak leng a kisin pan i hih manin hangsanna tak tawh lungkia loin i mimal, innkuan, leh i Pawlpi bup in i nuntaknaah Kha thu leh Taksa thua na hoih i hih ngei nailohtetukum kisin tek leng khandan dik tak tawh i khangto ding a, tu 2010 ZBC Gambup thupulphuh adiungin "Kisin Kum" ci a, pilvang leh saupi muh kholhna tak tawh hong makai, i Siate leh i Upate lunggulhna hong tangtung ding bek tham loin, i vekpi adingin 2010 pen "Kum pha" a hong suak dingin Topa'n thupha hong piaksak ta hen. Amen. ■■■

## KHAMTUNG GAM A PASIAN THU LUT ZIA TAWM KHAT

*(Beginning of Christianity in Mizoram and Chin Hills)*

- Rev. G.K.Nang, USA

January 1, 1894 ni-in F.W. Savidge leh J.H. Lorrain Aizawl tung uh hi. Savidge pen "Sap Upa" ci uh a, Lorrain pen "Pu Buanga" ci uh hi. "A sam puang ahih manin Pu Buang kici hi", ci uh hi. A tun phetun pau sin pah uh a, A, AW, B bawlsak pah uh hi. Tua kum April 1, 1894 ni a kipanin Sanginn phuan pah uh hi. Amau pen England gam mihau (millionaire) Mr. Arthington in a vak ahih manin Arthington Mission kici a, kum 4 a sep khit uh ciangin Lunglei lamah pai uh hi. A mau laih dingin Rev. D.E. Jones leh Rev. E. Rowlands 1897 kumin tung leuleu hi. Kum 1921 ciangin E.L. Mendus (Pu Mena kici) in sem a, 1944 dong om hi. Sangmang J.H. Cope in 1938 kumin Mizogam missionaryte tawh kilemna suai kai (sign) dingin gamgi lamah khualzin a, June kha tuuk guahzuk hun ahih manin guahpi thuak a, cisa natna leh sungpai natna ngahin sihhlawh hi.

Kilemna suai a kaihpihte pen kuate hi ding hiam cih kithei lo a, ahi zongin Rev. Mendus leh Lunglei lama om Savidge leh Lorraine hi kha thei ding hi. Tua hun lai-in missionaryte in gamgi khen uh a, mission khat a lut khitna-ah mission dang lut beh lo ding, kibuaisak lo ding cih deihna hi. Hih thukimna pen Mizogam Pawlpi thu ciamtehnate ah om kha ding hi. Mizogama ordained Pastor masa pen Chhuahkhama hi a, 1913 kumin ordination kipia hi. Zogamah ordained Pastor masa pen Vial Nang hi a, kum 1925 kumin ordination kipia hi. 1897 a kipanin Welsh Calvinistic Mission in la a, missionary masa pen D.E. Jones leh Rowlands ahi uh hi. Tua ahih manin Mizogam Presbyterian pen tuma hun khat lai-in Welsh Mission zong kici hi. Kawlgam Tuiphum Pawlpite ABM (American Baptist Mission) a kicih tawh kibang hi.

1908 ciangin Welsh gam panin Watkin Roberts missionary dingin Mizogam tung hi. Amah pen Welsh gam khanlawhna hun sunga piangthak hi a, private missionary a hong kuankhia ahi hi. Aizawl a missionaryte tawh semkhawm thei lo ahih manin Zalui zuak kawmin kham tungah vak hi. Tua bangin a vakvakna-ah Manipur leh Mizogam gamgi kianga khua om Senvon khua-ah 1910 kumin Pawlpi va phut hi. Hih khua pen Hmarte leh Thahdote khuapi khat, tua hun laia khua gol khat ahi hi. Hausapa Kam Kho Lian in Pasian thu na sang thei ahih manin Pawlpi phut thei hi. A nung ciangin North East India General Mission (NEIGM) kici phuan a, Lamka-ah phualpi nei-in, Manipur gam Zomite lakah Pasian thu puak masa pen a suak hi. Japan gal hong om ciangin ciah a, hong pai nawn loin, a mission pen Zomite in zomsuak hi. Lamka gama ECCI (Evangelical Congregational Church of India) leh EBC (Evangelical Baptist Convention) zong ama mission pana piangkha ahi hi. Tua hun lai-in Manipur suah lam

Ukhrul khua-ah William Pettigrew in Mission phual bawl a, Manipur gam pen Tuiphum Pawlpi huam sung ahih hangin Lamka gam pen en zo lo ahih manin mission dang lut a suak hi.

1902 ciangin Aizawlah Tan 3 sinna om ta a, 1903 kum ciangin a kiim khua 9 ah sang kihong ta hi. Kumpi in zong sanginn nei ta hi. 1903 kumin L.P. laivuanna masa pen bawl uh a, Mission sang panin 13 leh kumpi sang panin 14 in laivuan hi. Kumpi sang naupang 14 lak panin 6 bek in ong a, a dang teng kia khin hi. Mission sangnaupangte in hoih takin ong khin uh hi. 1905 ciangin Tan 4 kihong a, 1907 ciangin Tan 8 kihongin tua bangin sanginn khang to hi. Tua hun lai-in mun dangah sang om nai lo ahih manin Manipur leh a kim a paam panin sangkah mi 20 bang om hi kici hi.

Kum 1908 kumin Aizawl Mission Vengah Zato Siavuan Dr. Peter Fraser, MD in Zato phuan a, zalui zuakna (pharmacy) tawh thuah hi. Amah pen 1912 kumin ciah hi. 1928 kum

ciangin Dr. John Williams LRCPS hong tung hi. 1923 kum ciangin tu-a Zato omna mun Durtlangah kisuan hi. 1958 dong Welsh Mission Hospital kici hi. 1928 kum panin nurse sin theihna kihong a, 1944 kumin Assam Medical Council in recognize pia uh hi. Tu laitakin Durtlang Zato-ah Doctor-14, Sister-13, Staff Nurse 45 om a, GNM sinna zong omin kum simin mi 30 ta la den uh hi.

Zogamah Dr. E. H. East in 1902 kumin hong tun' ciangin Haka-ah Zato lupna 20 om theihna pan pah hi. Ahi zongin ama dam lohna hangin sawt om thei loin 1910 kumin ciah hi. A laih dingin Dr. John Woodinte nupa 1910 kum mahin hong pai hi. Ahi zongin a zi cidam thei lo ahih manin 1915 ciang kik uh hi. Zato lam nasepna pen Mizogam sangin kipan masa zaw a, ahi zongin lawhcing lo ahih manin tuni dongin Pawlpite in Zato nasepna kinei nawn lo hi.

Aizawlah Lai Siangtho Sang masa pen 1907 kumin kiphuan a, Rev. D.E. Jones (Zosaphluia) in bul pan hi. 1937

ciangin khawlsan uh a, 1951 ciangin Rev. J.M. Lloyd makaihna tawh kipankik a, 1965 kum panin Serampore nuai-ah L.Th. kipan hi. 1983 kum ciangin B.Th. pan uh a, Aizawl Mission Veng panin tu-a Durtlang munah 1995 kumin kisuan hi. Tu-in B.D. leh M.Th. sin theihna kihong hi.

Zogamah Rev. C.U. Strait in 1928 kumin Haka-ah Lai Siangtho Sang masa pen phuan a, mi 13 kah hi. 1941 a ciah ciangin kizom nawn lo. Rev. R. G. Johnson in Japan gal khit hong paikik ciangin 1948 kumin Lai Siangtho Sang phuan kik hi. F.O. Nelson in 1947 kumin Tedimah Lai Siangtho Sang phuan a, mi 21 kah hi. 1953 kum a kipanin Falamah kituah a, tua panin Zomi Theological College kici hong piang hi. Tu-in B.Th. leh B.Min sin theihna om hi.

Mizogamah Luka leh Johan laibu 1898 kumin suak a, 1899 ciangin Sawltakte tangthu suak leuleu hi. 1916 kumin Thuciam Thak nei uh a, 1959 kum ciangin Lai Siangtho buppi nei ta uh hi. 2009 kum pen Lai Siangtho

buppi a neih uh kum 50 a cin' (Golden Jubilee) kum ahi hi. Jesu pen *Jishua* kici a, Jehova pen *Jihova* ci-in gelh uh hi. "S" munah "Sh" zang uh hi. Gentehna. Acts 1:26. "Tin ai a shan sak a, ai shan chu Matthia chung a lo tlu a. Tin ani chu tirko shom le pakhat zing chhiar telin a om ta a."

1908 kumin Cope topa Tedim om dinga hong pai pen Haka a tun' ciangin Sangmang Carson si ahih manin nusia thei loin, kum nih ompih a, 1910 kum ciangin Tedim hong kisuan thei pan hi. Tua hun lai-in Pau Cin Hau lai sim loh kinei lo a, Cope Topa in ABC hong bawlsakin, laibu hong gelhsak a, 1914 kum ciangin labu dawng 25 a om bu neu khat kinei a, 1915 kum ciangin Matthai laibu kinei a, 1931 ciangin Thuciam Thak kinei hi. Cope topa in zong "s" munah "sh" zang a, Zeisu pen *Jesu* cih kizang masa pen a, tua khit teh *Zheishu*, *Khazhih*, *Pashian*, *Kha Shiang Tho* ci-in na gelh hi. 1932 kumin Thuciam Thak masa pen a suah ciangin *Zeisu*, *Khazhih*, *Pasian*

cih hong zangin tua a paisuak ahi hi. Lai gelhzia pawl khat en dihi ni.

Labu masa pen 1914 kumin kibawl a, Doxology hih bangin kitei hi.

Thu pha khem piu hawng pia To Pa, Le tung mi hing a min phat ta, Van tung mi zong in To Pa Pi, Jesu, Kha Shiang Tho min phat hi.

**Mate Lai Thiang Tho, Tiddim Kam, 1916.** A lian 4:1-3. "A tu ciang in a doi mang pa je et ding in a Kha Shiang Tho in Jesu gam lak a a pai pi hi. Ni sawm li le' zan sawm li an ngawla a nung ciang in a gil hawng kiel hi. A je et pa in hawng nai a, Nang ma in Pashian ta pa n' hi le' hi shuang te kho mun n' shuawk sak in a ci hi."

**Zawhang Lai Siangtho, Tedim Kam, 1923.** A lian 3:22. "Tu a nung ciang-in Zheishu in a nungzhui-te tawh Zhuda gam-ah pai uh leh tua san tak-ah amaute tawh a om khawm a tui shung-ah a phum uh hi. 3:28. Keimah in, Khazhih kah hih kei hi, Khazhih mai-ah hong pai sak pa kah hi, ken ka ci hi." Hih danin kammalte kilaih toto ahi hi. ■■

## REVIVAL LEH EVANGELISM

- Kham Do Pau, Aizawl

*Hih thumal gel a kibat lohna na ngaihsun ngei hiam?  
Ngaihsut kizam na sak lam ahi hiam?*

Revival i cih ciangin nuntakna a neisa khanglosak kik cihna hi a, a nungtasa lote pen khanlawh kiksak theih hi lo hi. Pasion ah nuntakna a nei nai vet lo, mawhna leh gitlohna hanga si sate nuntakna thak piak pen Evangelism ahi hi (Efesa 2:1). Khanlawhna pen Khristiante ading ahih laitakin tangthupha puak a nungtakna thak piakna pen Khristian ahi nai lo, thu-um nai lo mite ading ahi hi.

Lungdamna thu sang thei a, Khri pen Gumpa a san ciangin Khristiante in ama kiang panin nuntakna ngah uh hi. Ahi zongin, vot lah vot vetlo, sa lah sa vet loin na omna uh zong ka thei hi (Mang. 3:15). Ahi zongin, note ka hong mawhsakna khat om a, tua in amasa laia kei na hong it bangun tuin nong it nawn kei uh hi (Mang. 2:4). Hih bang mite in khanlawhna (revival) kizam hi.

Biakinn huang sung pen khawnlawhna dinga na sepna

mun hi a, biakinn pualam pen lungdamna thu tangkona munding ahi hi. Nuntakna thak a ngah lote in biakinn zuan lo uh a, amau omna munah i va naih a, nuntakna thak nei dinga i va pii masak kizam hi. Khanlawhna pen biakpiak kikhopna ah sermon ngaihkhiatna panin kingah thei hi.

Tua hih ciangin, Zomite pen Pasion thu lam leh leitung vaiah zong i mang khawm uh hi. Khalam thu a khanlawhna (revival) i kizam mah bangin i minam vaiah zong khanlawhna i kizam mahmah hi. I Khanlawh zawh loh manin i tate, i tute i innkuanpihte mangcip uh a, i pau i lai, leh i ngeina khempeuh i mansuahphial uh hi. Tuata a khanglosak dingin taksa lam Evangelism i kizam mahmah uh hi. Api apu khanga namdang tawh a teengkawm Zomite in taksa lam Evangelism i hahkat kei leh, a mangcip takpi ding mi

tam mahmah hi. Tulai Zomite lakah Kha thu lama Evangelism sangin ah minam vaia Revival i kisam zawta uh hi. Bang hang hiam cih leh, nu leh pate in hoih tak a pattah sa hi napi, a tate un zi leh pasal mi dangte hong neih ciangun ei a lam thupisim loin, i vengte' a lam thupibawl zaw hamtang uh hi. Hihte pen a thei lo hi loin, a theisa kitheih loh bawl ahih manin Revival kisam pha diak uh hi. Pi le pu hun lai panin namdang tawh a teengkawm Zomi namte i ngeina, i lai leh i pau a thei nawn lo, tuate deihna takpi zong a nei zo nawn lote kiangah i minam vai a Evangelism i hah bawl ding thupi hi. Bang hang hiam cih leh, Pasian in Zomite zong lai leh pau, Lai Siangtho leh Labu hong pia a, tuate zanga Zokam tawh Amah bia dingin hong deih ahi hi. ■■

### MIZORAM BAPTIST PAWLPI 3 KIMUKHAWM

Feb. 24, 2010 in Aizawl a Baptist House ah Baptist Church of Mizoram (BCM), Zomi Baptist Church (ZBC), leh Lairam Jesus Christ Baptist Church (LJBC) te sung panin a makaite uh thum tek paikhawm uh a, mailamah kipawlkhopna kicianzaw neih a ut thu gen uh a, sepkhop a kul thu zong gen uh hi. Hih Baptist makaite kimuhna ah Aisian Pacific Baptist Federation a General Secretary a sem Rev. Bonny Resu leh Asian Baptist World Aid makai Rev. Kabi Gangmei kihel uh a, amaute in Tuiphum Pawlpite sanggam khat i hih thu leh a ki-entuah, na a semkhawm ding i hih thu gen uh hi.

Baptist Pawlpi pen India Malsuah lam Pawlpi lianpen hi a, ahi lo lua a Pawlpi dangte tung pan bawlsiatna a thuak a om leh, North East India Christian Council leh National Christian Council dongah thu kizasak a kulte imcip loin zaksak a kulna gen hi. Khristian Pawlpi tuamtuamte i omna Pawlpi a kibat lohna hangin kilangneih ding i hih lohzia kilim gen mahmah hi. ■■

## ZBC MISSION KHAWMPI KA MUH DAN

- Tg. Tin Sawm Lian

Hiangmun khuaah Mission Khawmpi 4 - Veina tung ding cih ka theih ciangin kihel ka ut mahmah a, hih khua pen ka muh ngei nai loh khua ahih hang zong ka kihel nopnate' laka khat ahi hi.

Champhai pan mawtaw sungah vokno, uino puak bangin a khente dingin, a khente tuin, la kisa ziahziah a, nuam kisa mahmah lel hi. Tuichang ah zingan ne-in, tawmvei kikhawl a, tua khit ciangin Hiangmun lam zuanin kitai vingveng hi. Kawlkulh khua kiang leh Teikhang kiangah mawtaw lam haksatna tawm om hi mah leh, Hiangmun khua pen cidam takin 7:00P.M kiim in kitung thei hi. Hih ka khawmpi siimna tungtawna ka gennop pawlkhat kong gelkhia hi:

1. **I kikhel ding om** : Khawmpi i pai ding ciangin makai te'n a pai nuamte min piak ding, mawtaw zonna a buaihuai loh nadingin.. ci a a gengen uh hangin, a pai nuam, a pai thei ding gegu bangzah hiam min pia nuam loin, pai hun kuan ciangin mi kitam zel hi. Makaite luvaisak in, i pai kuan ciangin mawtaw zon kikkik kul zel hi. Tu tunga khawmpi ah zong Champhai lamte nai 5:30am a pai akisawm pen mawtaw ngaihsut sa ah kita lo ahih manin, a pai hun kuan ciangin mawtaw dang zon kik hong kul mawk hi. Tua ahih

manin, pai hun ding ciangin kipai thei lo a, tun hunin zong kitung thei lo pah hi. Tua in a khuatualte buaisak hi. Picin lam manawh zel i hi a, tua bangte ah zong picing takin i om ding deihhuai mahmah hi.

2. **Hiangmun kuate etteh huai** : Khristian nuntakna Hiangmun kuate tungah kilang mahmah hi. ZBC pawlpite kithutuakna leh nasepna pen tampi gen kei leng zong zindo a siamdan leh a kipiakzawhna uh phathuai mahmah hi. Tui tam lo ahih manin zan hak phialphial a

tui a ngak hun uh zong om hi.

Hiangmun khua sung mipite kithutuakna zong a ettehhuai mahmah hi. Amau genna mah bangin Hiangmun khuaah Khawmpi a om ciangin bang pawlpi bang pawlpi ahi zongin biakinn khakin ki-uap zel uh a, tu tung ZBC Mission Khawmpi ah zong pawlpi dang : Evangelical Baptist Convention (EBC) leh Presbyterian te in biakinn khakin, a kipat ni pan kipan a tawp ni dong hong uap uh hi. Sanggam EBC te bangin kikhop simin la hong sa thei uh a, siam kisa mahmah a, tha zong kingah lawh mahmah hi. Hih bang a khua kithutuak, pawlpi ki-uap tuah diamdiam pen leitungah a tam ding ka um kei a, a om leh zong tam het lo ding hi. A Khristian nuntakna uh kilang ka sa mahmah a, hih bang zel a a khua uh a kithutuak uh leh, a maban uh hoih mahmah dingin ka um hi. Khua pawlkhat a khawmpi i neih ciangin a pawlpi dang upate in a members kikhawm nuampipi a kham biikbeek uh hi.

**3. Khangnote pahtakhuai :** Tu

tung Mission Khawmpi a pai 270 kiim lakah khangno 200 sangin tamzaw ding hi. Khangno te'n ahih ding bangbang uh zo tak leh thalawp takin hih thei uh a, khangnote zong picing mahmah ta hi. La makai dinga a kisehte in zo takin hong makaih a, la makaih ding a a kisehte in siam tak leh lawp takin la hong makaih a, tumging tum siam taktakte in siam tak a hong tum uh ciangin tha kingah in, tua tungtawnin Kha Siangtho nasepna zong hong tung hi. Khangnote lakah thu dang la dangte sanga Pasion a ngaihsun zaw hong tamta cih kitel mahmah hi. Hnahlan khangnote hong thalawp dan khawng, Aizawl khangnote kithutuak dan khawng, Hiangmun khangnote kipiakzawhnate khawng etteh tak mahmah hi.

**4. A nengkai tam lua :** Khawmpi i zat ciangin programme a akihel lo, vai tam thei lua a, tua in i hun zatna hong nuamsak lo zel hi. Adiakin lasakna ah, kiging khol lopi a a sa thei khin zong hi lo, mi'n sa tah cih hanga la sak teitei sawm, *na na na.....* cih khawng maimai tawh la i sak in hong

nawngkaisak hi. Hih bang khawmpi lian i neih ciangin la sa nuamte in zong hoih tak leh kiging khol sain la hong sin hen la, mite ngakngak, la thu thei lo, music tawh kituak lo etc. cih bangte om nawn kei leh deihhuai hi. Lasak limlim a nial ka hi kei a, i lasakdan ah a hoih ka deih luat man ahi hi.

**5. Hih bangin ci leng :** Biakpiakna programme sungah la makai ding a kiese leh, tua la makaite in hon thungetna leh hun apna hong makaih suak leh hoih ding hi. Kha Siangtho nasepna hong tun a, lamna dianna hong tun ciangin hon thungetna leh kiapna kinei zel ahih manin hih hunap leh honthungetna pen la makaite tungah koih suk ziau leng, programme phatuam deuh ding hi.

Kiginni sunnung lam in programme om lo pen mi tampi adingin cimhuai mahmah hi. Biakpiakna a om kei leh, Fellowship na hun hiam in zang thei leng, tua hun sungah, lasakna ahi zong, talent kitheih tuah nading

ahi zong, ciamnuih nuihsuak bawlna hun ahi zongin zang thei leng, tua tungtawnin mi tampi in phattuampih ding a, a kitheih tuah lote kitheih tuahna leh hun awl, vak maimai hiam, lup maimaina hiam a i zat sangin bang hiam thu manpha khat le nih theih na hun manpha in zang zaw lehang hoih ding hi.

Hih khawmpi sungah Indian Evangelical Mission (IEM), Associate State Secretary ahi Rev. G K Ngaihte, Aizawl panin hong kihel thei a, Sia Awn Kam, ZBCM Missionary zong hong kihel thei hi. ZBC Executive Secretary banah Area Pastor teng hih khawmpi hunah hong kihel thei a, picing in khawmpi paite in nuam kisa mahmah hi. Kham lopi in 15 March 2010 zingsang nai 7:30 in Hiangmun khua Upa Cin Khen Khup in thungetna hong neihsak a, *Mangpha man ni, mangpha, khenta ni khenta ni, omkhawm lai leng nuam lai ....* cih la sa in Hiangmun khua kipaisan hi. ■■

Letter no :CCJ-MC, 08/2009-10

Dated : 5.3.2010

To,

Editor

*Laitai*

*ZBC, Champhai*

**Athu : Thu zaksak ding ngetna**

1. Sangmang Cope topa in Tedim gamah Pasion' Gupkhiat Lungdamna thupha puak a hong om sung (1910-1938) in **Tuiphumna (Baptism) a piakte**, leh nupa kop a **kitensak (letthat)te** a tangthu gelh nading lai (form) kibawl a, TBC zum (Tedim) leh ZCLS zum (Kalay/Kawlpi) ah kingah thei hi.

2. Tedim kampau Zomite' lakah **kum za khat (100) a nungta ngeite/laite** zong kithei nuam ahih manin, lai (form) kibawl a, TBC zum (Tedim) leh ZCLS zum (Kalay/Kawlpi) ah kingah thei hi.

3. Cope kum za pawipi ah **Pa, Tapa, leh Kha Siangtho min** tawh **Tuiphumna (Baptism)** om ding a, ngetna lai (form) kibawlin TBC zum (Tedim) leh ZCLS zum (Kalay/Kawlpi) ah kingah thei hi.

A tunga nambat 1&2nate pen **taangthu-in a kiciamteh (History Record)** ding hi a, nambat 3na pen **kum za cin dawnna ciaptehna** dinga i deih ahi hi. Ahih theih leh a kila lai (form) peupeuh anunung pen, 2010 kum June kha beima-in TBC zumah hong tungkik leh ut hang. Tua ahih manin i hih theih zahin kihuh a, i zaksak ciat nadingin hong thum ung.

Muanna leh lemetna lianpi tawh;

Khrih sungah

Sd/-

Rev. Thang Go Khup  
Secreatry, CCJ-Tedim  
Chin State, Myanmar

**LITAI HUHNA PIATE**

	Min	Khua	Piak kum	Rs.
1.	Upa Tun Khan Pau	Melbourne	2007	1500
2.	T. K Lala	A. R.	2007	100
3.	Siapi Suan Do Cin	Vanzau	2007	100
4.	Khen Thang	Khawzawl	2008	150
5.	K. S Manga Naulak	A. R.	2008	50
6.	Upa Tun Khan Pau	Melbourne	2008	1000
7.	S. C. Mang	A.Regt./Sesih	2008	100
8.	Tg. Z. K. Mung	A.R./Vapar	2009	100

Litai Editorial Board in hih atunga Litai huhna hong piate tungah lungdam thu kipuak hi.

**LUNG DAM KOHNA**

Teikhang ZBC biakinn ading Aizawl ZBC in mei (electric) hong bulhsak manin ka lungdamna uh Litai tungtawnin ka hong zasak uh hi. Pasion in Aizawl ZBC te mi a huh zo zel dingin thupha pia ta hen.

Teikhang ZBC tangin

Sd/-

Upa Pauta

14.3.2010

Secretary, Teikhang ZBC

**BAWL DIKNA**

*Litai February 2010 issue a cover sung lama theih sakna a kisuah ah Champhai ZBC Silver Jubilee hun pen 16 March 2010 hong kici kha a, hih pen 16 March 2011 cih ding hizaw hi.*

## VENGTHAR ZBC BIAKINN HUHNA PIATE

### Champhai :

1. **Rs. 1000 apia** : Khual Khan Pau
2. **Rs. 500 apiate** : Pu T. K Khai, Tg. Tin Sawm Lian, Nu Cing Ngaih Dim
3. **Rs. 200 apia** : Pa Zam Khan Tuan
4. **Rs. 100 apia** : Pa Dong Khan Thang
5. **Rs. 50 apia** : Pa Kai Khan Tuang

### Aizawl :

1. **Rs. 2000 apia** : Sia Kham Suan Pau
2. **Rs. 1000 apiate** : Pa Lang Cin Tuang, Upa H. Thawng Pau, Pa Joseph Sawm Thang
3. **Rs. 500 apiate** : Upa Go Khan Tual, Upa Gen Khan Do
4. **Rs. 300 apia** : Pa Kam Mung
5. **Rs. 200 apiate** : Nu Cing Lam Dim, Pa Nang Ngaih Lian
6. **Rs. 100 a piate** : Sia Vum Hau Thang, Pa Khen Tung, Pa Suan Khen Kham, Upa Gin Za Go, Pa Zam Khan Mung, Sia Nang Sian Mung, Pa Khup Khan Pau, Upa J. K Thang, Pa Kap Do Dal, Nu Cingpi, Rev. Dai Do Thang, Pa Nang Khaw Suan, Upa H. Khoi Pau, Pa Tuang, Mintheih loh, Pa Zam En Tuang, Pa Lang Khan Lian, Pa Nang Deih Cin
7. **Rs. 50 apiate** : Pa Ngin Ngaih Thang, Pa Dong Ngaih Thang
8. **Rs. 20 apiate** : Tg. Gin Sawm Tuang, Pa Nang Sian Pau
9. **Rs. 10 apia** : Nu Niang

Biakinn ading huhna hong piate, zin hong dote leh nek le dawn limtak hong pite tungah lungdam kong ko uh hi. Tua banah Aizawl khuasung ah hong vakpih Rev. Dai Do Thang tungah zong lungdam ka ko uh hi. Topa 'n na sup na bainate uh a zah tampi in hong dim kik ta hen.

Sd/- Upa Pau Lian Sang  
Chairman, Vengthar ZBC

## 62<sup>nd</sup> ZOMI NAM NI, 2010 A.D.

### Shillong, Meghalaya :

A - 62 veina Zomi Nam Ni pen Shillong khuapi sung a om Zomite in nuam takin Zomi Baptist Church biakinn ah zing nai 10:30 pan nitak nai 3:00 ciang hun nuam takin zang thei uh hi. Lia Khan Cing leh Tg. Suan Ngaih Cin te in siam takin makaih uh hi. Upa Gin Khan Mang, Chairman, Shillong ZBC in hun-apna a neih khit ciang la siamte in lasakna nei uh hi. Hih hunah Dr. Hau Za Cin in "Zomi Nam Ni hong pianna thu" cih thulu zang in thu gen a, makai leh Upa bangzah hiamin zong thugenna hun nei uh hi. Hunzawh lungdam kohna Rev. Cin Kam in a neih khit ciang kham lopiin kikhen uh hi.

### Vapar, Mizogam :

Vapar khua ah A 62-veina Zomi Nam Ni pen Pawlpi tuamtuan kigawmkhopna Zomi Christian Fellowship(ZCF), Vapar makaihna tawh nei thei uh hi. 19.2.2010 zanin VCP, Upa Zam Sian Pau Zinmangin zangin, Solo competition nei uh hi. 20.2.2010, sun hunin Champhai DC Office a Superintendent a sem ahi, Zomi Ulian Pu B. Zam Khaw Nang Zinmangin zang in, aman va uap thei hi. Zo lam Mizoram Upa Pawl(MUP), Vapar Unit ten nei uh hi. Hun man khit ciangin Niangtui lim mahmah hawpkhopna nei uh hi. Hih hunah Mipi 250 - 300 kim kihel uh hi.

### Lamka, Manipur :

Lamka khuapi sungah Zomi Youth Association makaihna tawh Zomi Nam Ni thupi takin zang uh hi. Kumpi Ulian Pu Phung Za Thang, Minister (Power, Hort& Soil conservation, Sc.& Tech.) banah MLA pawl khat in zatpih hi. Chief Minister in huhna Rs.1,00,000 pia hi. Galkap lam Parade group 6 in nei a, minam lam tuamtuan lam hi. Bawllung kidemna nei uh a, khatna Zomi Football Club (Jiribam) in sum Rs.1,00,000 ngahin nihna United Football Club (Ukhrul) in Rs.50,000 ngah. Cikha leh Tedim panin zong bawlung sui pai uh a, minam lam zong lak uh hi. Lamka bawlung tualpi dimin mi kikhawm a, Zomi Nam Ni a kizatna laka tu kumin mihing tampen dingin ki-um a, mipi 20,000 val khawng kihel uh hi.

### **Mualnuam, Manipur :**

Mizogam leh Lamka kikal a Zomite khua khat ahi Mualnuam khua-ah zong Zomi Nam Ni thupi takin bawl uh a, Mizogam panin ulian Pu Rohlun, Minister of Food and Civil Supply, Forest, zinzang hi a, Khawdungsei khua panin YMA leh lasa siam zong va kihel uh hi. Champhai panin Vanlalsawm IFS (DFO), Lalhmingliana DCSO (Supply), Ramdingliana PS leh Ngopa SDO sem lai Rolungmuan zong va kihel thei uh hi. Pu Rohlun, Pu Rolungmuan leh Pu Vanlalsawmte Zomi vive ahi uh hi.

### **Lawngtlai, Mizoram :**

Mizogam Lawngtlai khua-ah Young Lai Association makaihna tawh YLA Hall ah thupi takin Zomi Nam Ni zang uh a, Lai Autonomous District Council a makaipi Ngunlianchung,(CEM) in zinzang hihna tawh thugenna nei. Falam panin lam pawl pai-in minam lam tuamtuum lahna zong nei uh hi. Hih Lawngtlai khua-ah Zomi Nam Ni a kizat a khatveina ahi hi.

### **Delhi, India :**

February 20, 2010 ni in Delhi ah a 62 veina Zomi Nam Ni nopci takin bawl thei uh hi. Atawmpen mi 1500 bang kihel thei hi. Tutung Zomi Nam Ni pen kum dangte tawh kibang loin kum 10 nuai siah naupangte ngeina puante tawh Fashion Show lahna leh kidemna kinei-in, tua sung panin ei ZOMI Mungsan (U.S.A) in akhatna ngah hi. Lucky Draw sawkna zong nei in mipi in tha ngah mahmah hi. Buaina bangmah om loin nopci takin hun zang uh hi.

### **Chennai, India :**

Tukum Zomi Nam Ni pen kamsiatna tawh Vengnuam, New Lamka a teng pasal khatin nusia mah leh Chennai a Zomi ten nuam takin bawl thei uh hi. Hih hun ah Thahdola, Vaipheila, Mizo la zong kisa ziahziah ahih manin ZOMI ten minam ni bawlkhawm thei ta cih hong phawksak hi.

### **Bangalore, India :**

Bangalore a om Zomi ten zong Feb 20 Zomi Nam Ni pen Bangalore Zomi Welfare Department le Laizom Tongsuah Bi-Monthly News Letters Editorial Board makaih na tawh zang thei uh hi.

### **Tulsa, USA :**

Tulsa khua-ah Oklahoma Zomi Innkuan makaihna tawh thupi takin Zomi Nam Ni zang uh a, Rev. Dr. Ngul Khan Pau zinzang hihin, minam khantohna ding thu manpha tampi gen hi. Thu leh la lamah tai mahmah uh a, lam leh fashion show akipan lasakna tuamtuum om hi. Hih hunah Mautam kial huhna dong uh a, US \$ 2000 val ngah uh hi. Oklahoma state sungah Zomi 1200 val om ta hi.

### **Texas, USA :**

Texas State sung a Dumas city, Amarillo city, Cactus city sung a om Zomite kigawm in DUMAS CITY ah Zomi Nam Ni in bawng gol mahmah khat goin nuam takin bawl uh hi. Zomi ngeina puante silhin, a neu a lian in Zo lapi sain Zo lamin lamin nuamsa mahmah uh hi. Zomite bek tham lo Mexicante bang zong kihel in kikawi kawmin Zo lamin lam uh a, nuamsa mahmah uh hi.

### **Massachusetts, USA :**

Massachusetts Chin Community(MCC) , USA te makaihna tawh A 62-veina Zomi Nam Ni nuamtakin bawl thei uh hi. Zomi Nam Ni kibawl na sungah mimal gawm in 122 bang pha thei uh hi. Nek leh dawn MCC kipawl na in Dollar 2000 bei in bawl a, Hall pi khat Dollar 450 in kawmin Zomi Nam Ni nuamtakin zang thei uh hi.

### **Florida, USA :**

Florida gam Fort Lauderdale vengah Florida Zomi Innkuan makaihna tawh thupi takin zang uh a, lim lahna (drama) leh la siam tuamtuum in a sak banah Zogam kial huhna ding sum donna zong nei pah uh hi. Zomi Nam Ni pen midang adinga thupha ngahna suaksak uh hi. Tua hunah **Zonet Award for Writer of the year 2009** Rev. G.K Nang tungah Certificate piakna hun Rev.Dr. Chin Khua Khai in zang hi. A pai khempeuh mi 100 val bang pha uh hi.

### **Portland, USA :**

Portland khua (Oregon) ah Portland Zomi Innkuan makaihna tawh hun siangtho takin zang uh a, Zomite adinga thungetna leh Zomite UN ah min khum zawhna ding hanciamna nei uh hi. Zomi Nam Ni pen minam kip khat suah theihna dingin zang uh hi.

### **Suangzang, Myanmar :**

A(62) vei na Zomi nam ni- in, Tedim gam Suangzang khua in, sun hun in Zomite tangthu tuamtuam leh nitaak in, Zo lapi tawh Zongaina laamvuui kaai-in, nopcitak in pawipi bawl cihthu kiza hi.

### **Kalaymyo, Myanmar :**

Kum 62 cin Zomi Nam Ni pen Kawlpi ZBCM huang ah Chin Sangnaupangte mahkaihna tawh sun 11:00 pan 2:30 sung bawl uh hi.

Hunpi sung ah hun hon thugenna, tangthu genna, lungdam kohna le Zomi Makai te pahtawina nei uh hi. Hun nihna ah ngeina lam tuamtuam lahna nei in, hun thumna ah lasakna tuamtuam hi a, Zomi Siamsinte in *“Tun sung khat pan piang hi ngeingei hang e”* cih la a group in sa uh hi.

### **London, U.K. :**

**20.2.2010** niin **Welsh Association Hall, London** ah Zomi Nam Ni nasia takin U.K a om Zomi te makaihna tawh bawl thei uh hi. Zomi bek hi loin minam dangte zong tampi kihel uh a, tha ngah thei mahmah uh hi. Mipi 300-400 bang pha in nuamsa mahmah uh a, hih Pawi sungah Zomi Innkuan UK pan khangno ten **Zogamnuam** cih la pen lam kawmin sa uh a, etlawm mahmah in mipi in zong siam sain thangah thei mahmah uh hi. Thugenna tuamtuamte a bei khit phet in UK gam sung aa om **Zomi Musicians** te makaihna tawh Lasakna, nasia takin nei uh a, London a kibawl **2010 Zomi Nam Ni** pen nung kum lam mah bangin lawhcing mahmah hi.

### **Norway :**

Norway gam a om Zomi ten zong a omna tek uhah kikaikhawm in 62<sup>th</sup> Zomi Nam Ni nuam takin muak thei uh cih thu kiza hi. Nordland Norway a om Zomite in zong Sortland khua ah mi 60 val in nuam takin bawl uh a Media lampan Radio saite, Vesteråland thukante leh Hadsel sang siapinu zong kihel thei uh hi. Zomi nam tuamtuam teng leh Kawl, Rakhine, Shan, Kachin, Mon, Chinese minamte zong kihel thei uh a, Ålesund, Oslo, Froland leh Stavanger ah zong nuam takin hih hun zang thei uh hi.

### **Ottawa, Canada :**

Zomi Nam Ni pen 20 February 2010, 6pm – 9pm hunin Branson

Ave (Branson Centre) ah zang uh hi. Hih hun pen hun nih in khen uh a, a hun khatna ah thugenna hun leh a hun nihna ah Ngeina lam leh lasakna hunin zang uh hi.

### **Japan :**

Tukum 62-veina Zomi Nam Ni, Japan Zomite in zong nasia takin na bawl thei uh hi. Zogam lasa siam Lia Sung Tin Par in va uap thei-in, nuamsa mahmah uh hi. Pu Nang Lian Thang thugenpi (Main speaker) in pangin thugenna nei hi.

### **Yangon, Myanmar:**

Yangon ah Thakhin Than Pe inn ah Zomi Nam Ni kibawl a, Chief of Staff Army ( Ex) leh NLD Makaipi a hi, Tin Oo in zong hih hun zatpih thei hi.

### **Sweden :**

Zomi Innkuan Sweden in zong Sweden gam Ljusdal khua ah A 62 veina Zo Minam Ni nuamtakin bawl thei uh a, Kachin, Karen leh Shan minam te zong kihelthei uh hi.

### **Philippines :**

A 62-veina Zomi Nam Ni (or) Chin National Day pen Philippines ah Feb 20 ni tak 1:00am - 5:00pm sung Kowloon (Sen Ann sai lian mahmah) khat ah bawl in minam kim ciat in ngeina leh la sakna tawh Zomi Nam Ni muak uh hi. Tualaiah Zomi Innkuan Philippines innkuan sung panin Rev. Langh Khan Thang in kipatna thungetna nei in Rev. Vumpi in Welcome Remark pia in, Dr. Khup Lian Pau @ Paubawi in Unity in Diversity bulpuh in thugenna nei hi.

Mun danga Zomi Nam Ni a kizatnate hong kisuah kim thei lo ahih manin nong theih siamna uh kong ngen hi.

- A kaikhawm : Tg. Tin Sawm Lian

## TULAI THUPIANGTE

1. Lamka khua DC in numei Jacintha Lazarus IAS hi a, SDO pen numei mah Rachel N. Guite ahi hi.
2. Tg. Kam Za Khai s/o Khen Khan Cin USA in a omna Ohio khua Columbus, USA ah nasepna ngah ta cih kiza hi. Tg. Khaipi pen ngangin Aizawl ZBC ah BYF member ahi ngei ahi hi.
3. Mizogam Murlen khua in a khua saat zawh khum 75 a cinna paw nopia takin March 5-6, 2010 in bawl zo uh a, a beisa kum 75 sungin Murlen khua mi 147 graduate zo om ta hi.
4. Yangon panin a kikhen ZOLUS Journal Tedim khua panin kingah thei cih thu kiza hi.
5. Mizogam ah lohalna hangin gam kang tama, mi 4 in sihlawh ta cih thu kiza hi.
6. Hiangmun ZBC Pawmpi biakinn a soal (floor) Cement tawh kizut a, a umna zong etlawm takin kibawl hi.
7. Champhai pan Hnahlan - Vaikhawtlang - Kawlbem - Mimbang ah mawtaw tawh khualzin suak theih ta hi.
8. ZBC Zumah hih anuaia laibute kingah thei lai hi :
  1. Leivui Panin - Rev. Khuhp Za Go Rs. 100
  2. Pawlpi Makai Khutzat - Rev. Job Thawngno Rs. 50
  3. Tongdot (Tedim - Englist Dictionary) Rs. 60
  4. Pastorte Tuucin zia ding - ZCLS Rs. 60
  5. Tedim Lai Siangtho (Puahphatna) Rs. 120
  6. Siansan Labu - ZBC Rs. 70
  7. William Carey - CBLB Rs. 70
  8. Thuciam Thak (pocket size) Rs. 30
9. March 12, 2010 in Aizawl khuapi ah mi 10736 in 'Cheraw lam' piah uh a, Cheraw bu (group)761 a hun kibangin zangkhawm uh a, Guinness World Record cing cih thu kiza hi.

10. India gam vaihawmna innpi (Parliament) leh State sung vaihawmna innte (State Legislature) ah numeite ading seat 33% koisak nading Women Reservation Bill 2010 pen Rajya Sabha in 9 March 2010 in thukimta uh hi. India gam vaihawmna ah numeite adingin hamphatna a kibawl a khatveina ahi hi.

11. March 6, 2010 in Congress Working Committee a Chairperson Pi Sonia Gandhi in Aizawl Mualpui ah Rajiv Gandhi Sport Stadium sak nading suang phum cih thu kiza hi.

12. Sachin Tendulkar in India leh Africa Cricket kimawlna 2nd ODI, Gwalior munah February 25, 2010 niin ball 147 ah Run 200 sat man a, ODI Cricket Tournament ah Run 200 a sat khia thei masa pen ahi hi. Amah pen India mi ahi hi.

*Cimphawng...*

### LATAI CROSSWORD

d a d d x m a l a k h i v v a r  
 d p a i k h i a t n a k g f e o  
 a d d a n h l i h u h t h h h o  
 m c t w d n i h h s g a t a a u  
 e s t r e s a s z a s s d c b u  
 z o h n l t o g a d e a g i a n  
 e i u a d j a b u i e l a t k q  
 k d h k h o t l u y a l m d u i  
 i m i k a h d z l h i h l k k p  
 e s l p h s l a b p a l a m l m  
 l n h t h o t a m o z n k a u s  
 n a k a o l c a g a u o v h d r  
 o p i a n c i l n a o r a i s g  
 s i k k t s f m p m n n k u a a

Tedim Lai Siangtho (Thuciam Lui) bu min 17 kikoih hi. Na mu zo hiam zong dih ve?